

Jeims

na letama tauwai sumaḡa matabudi ḡarodie

Jeims na waikaiwama

1 ¹Taugu Jeims, Mamaitua be Bada Yesu Keriso adi taunoyama uma letanama yà girugirumina taumi aitaḡa Jius banegimima tauwai sumaḡa koya daberara be dobu matabuna nopodie ko miamiana ḡaromie, taumi matabumi yàwai kaiwemina.

Piripiri be raurubu

²Yau bana, taumi piripiri tabutabu ko banabanavidina raḡandie, taumi sibo koyai nuaverena, ³baninama raurubu ami waisumaḡama e voie da taumi koi rewapanana. Vutuna aubainama raurubu ko dampore da e naḡo kwasana. ⁴Be deḡoda raurubu ko damporena, taumi tokare ami waisumaḡe ko kaiguratena, be kaigurata e voie da taumi tokare nuemima e bagibagi, ei rewapana be tokare nam aba ko maruabie.

⁵Be tam aitau nuauyauya kwa ḡoeḡoena, naumeki da Mamaitua kwai baḡa be tauna tokare e utemna, baninama tauna nuanama vereverene e paipairuna banaga ḡarodie. ⁶Be tam Mamaitua kwawai baḡana raḡanine, naumeki da kwai sumaḡana, be nam kwa noḡotabekubeku, baninama aitau da e noḡonoḡota bekubekuna, tauna inam maika rabama sive e riḡariḡa waibabarina maika. ⁷Inam nama baneginama na waibaḡama tokare Bada nam e vaie be na ḡoanama e ute, ⁸baninama tauna noḡota raḡaraḡa baneginama aubainama. Tauna na noḡotama ta naḡonaḡo yabayababana, be nam gabu tenaḡa tima kenakenana.

⁹Be tauwai sumaḡa aitaḡa waikaruwaḡewaḡedima sibo ai nuaverena, baninama Mamaitua matane taudi waiguyau banegidima. ¹⁰Be taudi aitaḡa waiguyaudima, taudi sibo a kataie da Mamaitua matane inam waiguyaunama kavakavanama, be inam waiguyaunama tokare ei kavena

dobira beraninama busonama maika. ¹¹Baninama suara e raranana raḡanine, mui ta poki be inam beraninama mate busonama e poki da e kuruvana. Be beraninama kurinama noḡone tē kitakitana tokare ei kavena. Inam kauinama tenēḡinama nama banaga waiguyaudima, taudi tokare adi yawasanae a waiguyauna mate tai kavedina.

¹²Nuavere tauna aitau raurubue e midimidi bagibagina, be nam ima bekubekuna. Tauna tokare na maesama yawasana kenakena nonoḡinama e paḡona. Inam vutuna Mamaitua ya saugana da banaga aitaḡa tawai nuapaḡoena e utedina. ¹³Be aitau da raurubu e banabanavina raḡanine nam sibo ya riuna, “Uma inam Mamaitua e rarau rubuguna”, inam avedi. Baninama Seitan tokare nam teneteneḡina da Mamaitua e raurubu da gewagewa e voie, be mate Mamaitua tokare nam aitau e raurubu da gewagewae e beku. ¹⁴Ibewa da banaga nopodie, wainua noḡonoḡota gewegewedima e soru nawedi be e gwayegwayedina. ¹⁵Be wainua noḡonoḡota gewegewedima ta moramorabana damone, gewagewa ta tubutubuḡana. Be gewagewa damodie guri ta tubutubuḡana. ¹⁶Vutuna aubainama yau bana, nam aitau sibo yai kedadoka waigewemi.

¹⁷Yaba veredi be wainua vaivaidima matabudi note Tamadama ḡarone be ta yovoyovona. Tauna vutuna yana Tamanama, be tauna nam maika vaguru da ewai kati vitavitare. ¹⁸Mamaitua na riukauama ya utedana, aubainama taunaḡa na ḡoane tauda ya vinedana da tauda tauna na sedama tē tubuḡana. Be yaba matabudi ya voivoiedina nopodie, tauda tē saḡa guratana.

Tà vaie be tà voiena

¹⁹Yau bana, uma giunama ko noḡoti: Taumi waibeavaia, naumeki da koi beavaia kauana, be nam giu koi paparane, be nam ko medi makai. ²⁰Baninama medie tam tokare nam Mamaitua na ḡoanama kwa voie be didimanae kwa mia, ibewa.

²¹Vutuna aubainama yawasana miremiredi be gewegewedima ko gose poredina. Be Mamaitua riunama nopomie ya kumakumana, vutuna voyaḡote ko paḡo be ei yawasanimina.

²²Nam na giuma ko vaivaia ḡome, ibewa da taumi aba koya vaivaiena, naumeki da ko voiena. Be deḡoda vaienaḡa ko vaivaiena be nam koma voivoiena, inam taumiḡa kowai kedadoka waigewemina. ²³Tam deḡoda Mamaitua riunama vaienaḡa kwa vaivaiena, be nam kuma voivoiena, tam inam maika banaga garasie noḡonama kabe i kitakita, ²⁴be garasi e gosegose porenā raḡanine, tauna noḡonama kitanama nuanama ya koana. ²⁵Mamaitua na tarawatuma vaunama, inam Keriso varinama vere vavasāḡinama, inam vutuna banaga e kuvekuvesidina. Be aitau da inam tarawatunama vaunama e kitakita nonoḡe be e voivoiena, Mamaitua inam baneginama tokare na voiama matabudi ḡarodie ei aiainina. Baninama tauna aba ya kitakitana, nam nuanama ima koakoana.

²⁶Aitau e riuriu munaġena da tauna Kuristen be menanama nam ima raberabe kauena, inam baneginama tauname ewai kedadoka waigewa munaġena, be na waikuristenma inam kavakavanama. ²⁷Tamadama Mamaitua matane, Kuristen vere vavasaġinama inam umanama: Kedakeda be kaiyababa adi nuaboyae ko sagudina. Be ko rabe kauemi da nam dobu na yawasanae koi yoġimi.

Nam banaga verediġa ko rauneneedi

2 ¹Yau bana, taumi dà Badama Yesu Keriso boruboruminama kowai sumaġena, aubainama nam banaga verediġa ko rauneneedi.

²Deġoda taumi koyawai taparoro be banaga rabui sibo ti saġana, banaga tenaġa na garama veredima be na waisiama maesidima dosidima, be banaga ġesaunama waikaruwaġawaġanama na garama ragoragodima. ³Be taumi deġoda banaga waiguyaunama taunaġa ko raunenee be ko riuenta, “O turaguma, kwa verau uma guni verene kwa mia.” Be banaga waikaruwaġawaġanama ko riuenta, “Aii, tam noa dabudine ġavoe kwa midi.” bo “Murigue dogae kwa mia, be nam gunie.” ⁴Taumi aba kowai tubuġi? Taumi inam noġota gewegewedie banaga ko kitakita wairuvedi, be inam kauine Bada tubuġinama ko daridariġena.

⁵Yau bana, koi beavaia. Dobu banegidima adi waikitea banaga waikaruwaġewaġedima taudi kabe banaga yababa. Be Mamaitua inam banegidima ya vinedina da taudi adi waisumaġama ei rewapana be na waiguyauma tai buderiena. Inam waiguyaunama vutuna Mamaitua ya saugana da aitauga tauna tawai nuapaġoena ta paġona. ⁶Be taumi banaga waikaruwaġewaġedima ko riuriu saisairedina, taudi nam aiyaba ġaromie tima voivoia waigewana. Be waiguyau banegidima taudi vutudi taumi ta kawakawa gewegewemina. Taudi vutudi ta etaetaremi, ⁷be ami Badama isanama verenama tawai diboġina.

⁸Mamaitua tauna vutuna dà guyauma. Be girugiruminama porane tauna umanama ya riuna, “Turamma nuanuamma e paġona, maika nema tam kwa ġoeġoe munaġemna nama.” Be deġoda taumi inam giunama koi muriwatanena, taumi naumeki da vere ko voivoiena. ⁹Be deġoda banaga ġesaudima ko rauneneedina be ġesaudima ibewa, taumi inam gewagewa ko voivoie be tarawatu kowai kati kotovina. ¹⁰Baninama deġoda tarawatu matabudi kwawai muriwatanedina, be nopodie tenaġa kuyai kati kotovina, tam inam tarawatu tabutabudima kuyai kati kotova rovodina. ¹¹Mamaitua ya riu vavasaġa be umanama ya riuna, “Nam kwa rauwaivi bo kwa rautauġoma”, be mate ya riuna, “Nam kwa vunuġa”. Vutuna aubainama tam deġoda nam ku rauwaivi bo ku rautauġomana, be deġoda kuya vunuġana, tam inam yaġoro tarawatu tauwai kati kotovinama.

¹²Mamaitua na tarawatuma vaunama, inam Keriso varinama vere vavasaġinama, inam vutuna banaga e kuvekuvesidina. Inam tarawatune

taumi tokare e etaremina, vutuna aubainama aba da ko vatovato be ko voivoiedina, ko kita kauana. ¹³Vutuna aubainama ami raunuatoima banaga matabudi ġarodie sibo ya kenana. Deġoda ibewa, etara raġanine taumi mate Mamaitua tokare nam e raunuatoiem. Tam yodi deġoda raunuatoi ġarome e kenana, naumeki da tokare nam kovoġa kwa banavi.

Waisumaġa voia mate

¹⁴Yau bana, deġoda tam aitau kwa riuna, “Taugu waisumaġa banegiguma”. Be deġoda inam waisumeġinama nam baninama mate, inam nama waisumeġinama tokare ei yawasanim, bo? Inam waisumeġinama kavakavanama. ¹⁵Deġoda turamma ġarone nam gara bo nam kani ¹⁶be tam kuya riuena, “Yau tura, ebom, kwai garagara kauana, Bada e rabem; kwa mia kauana.”, be tam turamma nam aba ku utena, inam waikaiwinama tokare turamma e sagu, bo? ¹⁷Be inam kauinama teneġinama nama, deġoda waisumaġa taunaġa be nam baninama mate, inam waisumaġa gurinama.

¹⁸Deġoda aitau yodi sibo umanama ya riueguna, “Banaga ġesaudima taudi Keriso tauwai sumaġenama, be ġesaudima voia veredima tauvoiedima”. Naumeki da taugu inam baneginama yodi umanama yà paribeena, “Deġoda tam Keriso kwawai sumaġena, be am waisumaġama nam baninama mate, taugu nema yà katai bake da tam am waisumaġama riuriukauina? Be taugu waisumaġa baninama yà voiedi be ko kitedi. Yodibe ko kataie da taugu yau waisumaġama inam riuriukauinama.”

¹⁹Tam kwawai sumaġana da Mamaitua tenaġa e miamiana. Inam naumeki. Be penama mate tawai sumaġana da Mamaitua tenaġa e miamiana, be taudi Mamaitua ta naire be naira e kawakawa gusugusudina. ²⁰Tam kuya bua kauana! Taugu yodi yài kataim da waisumaġa nam baninama mate inam waisumeġinama kavakavanama.

²¹Bonimai waġadama Eibraham kwa noġoti. Mamaitua Eibraham na yawasanae ya kawa didimanina, baninama na voiama aubainama. Tauna natunama Aisik raupuyo aubainama ya pani be olta debane ya boruna, waigurinama aubainama. ²²Yodi ko kita, Eibraham na waisumaġama be na voiama ta noyanoya tenaġana. Eibraham na voiama tauna na waisumaġama yawai kawa riukauena. ²³Inam kauine girugiruminama porane umanama ya riuriuna, ya kawa neganegana, “Eibraham Mamaitua yai sumaġena, aubainama Mamaitua Eibraham ya kawa didimanina.” Vutuna aubainama a riuriuna, “Eibraham Mamaitua turanama”. ²⁴Yodi ko kita be ko kataie da Mamaitua banaga nam adi waisumaġama taunaġa aubainama i kawa didimanidina, ibewa da adi voiama mate aubainama ya kawa didimanidina.

²⁵Inam kauinama teneġine, toretore waivinama isanama Reiheb, tauna Josua na tauwai neneġanama ya sagudi be muriġa semoe wari

kedaḡa ya riupore nawedina. Vutuna aubainama Mamaitua tauna ya kawa didimanina. ²⁶Deḡoda tubuḡa ḡarone arua ibewa, naumeki da inam tubuḡinama ya gurina, be kauinama teneḡinama nama, deḡoda waisumaḡa nam baninama mate, naumeki da inam waisumaḡa gurinama.

Menamma kwa tom

3 ¹Yau bana, nam matabumi tauwai katakatai ko tubutubuḡa, baninama ko noḡoti da tauma aitaḡa tauwai katakatai tokare Bada e etare vavasaḡemaina, nam taumi ḡesaumima maika.

²Tauda matabuda yaba toitoi ḡarodie tà bekubekuna. Be aitau da menanama e tomtomna, tauna banaga verenama, be tokare teneteneḡinama da na yawasanama e rabe kauena. ³Banaga hosi ta gerugeruena raḡanine, taudi hosi mudunama taie ta nigori, be inam tainama ḡaubonama ta sorosoruna ruvane hosi dosinama e voteyateya be nama e naḡonaḡona. ⁴Be mate waga ko noḡoti, tauna sive dosinama e suvesuve waibabarina. Be yabiyabi ḡaubo ḡominama inam waganama dosinama e boruboru waididimanina, kapena na ḡoanama ruvane e naḡonaḡona. ⁵Inam kauinama teneḡinama nama mena, mena inam yaba ḡaubo kokonama tunide e kenakenana. Be inam menanama ḡaubonama e voida da tà seḡaseḡara be pipipiri dosidie tà tavatavana. Be kodara ko noḡoti, kodara pakanama inam kai menanama ḡaubonama, be e voie da kodara dosinama e tubuḡa be dobira matabuna noponama e karakaratina. ⁶Vutuna aubainama mena inam maika kai. Menadama inam gewagewa na dobuma tunide e kenakenana. Mena e kawakawa gewagewada, be e voie, da tauda dà yawasanama matabuna e gabugabu gorudana. Seitan tauna vutuna kai menade ya boru be e karakarata.

⁷Banaga tokare teneteneḡinama da musara matabudi, maika kiu, musara daredaredima be iyana tà kawa maraḡamidina, ⁸be nam aitau teneteneḡina da tokare mena e kawa maraḡami. Mena inam yaba gewagewanama mota sarama maika, banaga e karakarati be ta gurigurina.

⁹Tauda menade dà Badama bo Tamadama isanama tà kaikai suḡusuḡuna, be inam menanama teneḡine dà banagama tawai tara tautauedi be tawai tara mosikedina. Inam banegidima taudi Mamaitua ya voidina, kitedima tauna maika. Be tauda yaḡoro tà kunukunuredina. ¹⁰Yau bana, mududama tenaḡa kavakava, be nopone kaisuḡusuḡu be kunura ta dobidobi tenaḡana. Inam nam nama sibo tè voivoia. ¹¹Bigabiga tenaḡa nopone tokare nam teneteneḡina da upa verena be upa ḡoraḡoranama ta tava tenaḡa. ¹²Be mate yau bana, uma ko noḡoti: Damaya tokare nam e vota be gobara e tubuḡa, bo gobara tokare nam e vota be niura e tubuḡa. Be inam kauinama teneḡinama egasi nopone, tokare nam upa ḡoma kwa redu be teneteneḡina.

Nuauyauya riuriukauina be kaikaiyovunama

¹³Ĝaromie aita da nuanuauyauyanama, be Mamaitua na yawasanama ya kataiena, naumeki da tauna sibo na yawasanae ĝaromie vere ya maĝatarina. Tauna vere sibo ya voivoiedina, be inam kaudie banaga ta kita da tauna voyaĝota be nuauyauya baneginama. ¹⁴Be deĝoda tauna nopone unura, nuaĝoraĝora be moraba ta kenana, naumeki da tauna nam sibo ya kawa saĝe munaĝe be ya riuna, “Taugu nuauyauya banegiguma.” Inam matabuna kaiyovu be riukaua ta riuriu tuatuaĝaiena. ¹⁵Uma nuauyauyanama inam nam marae be i yovona. Ibewa, inam dobu, tubuĝa be Diaboro adi nuauyauyama. ¹⁶Vutuna aubainama deĝoda aita ĝarodie unura be moraba ta kenakenana, inam banegidima yawasanana kedanama nam ti kataiena. Be inam kaudie voia yabayababa be gewagewa ya moĝavuna.

¹⁷Be nuauyauya marae yovoyovonama inam na tabu. Inam nuauyauyanama e voida da tauda vere tã votedina, inam suba, miagenuana, voteyateya be raunuatoi. Be mate riukaue tã giuna, be nam tã noĝota raburabui, be nam noĝota miremiredima ĝarode ta kena. ¹⁸Suba tauvoiedima taudi adi banagama ta sagusagudina da subae ta miana. Vutuna aubainama taudi adi waikai saguma votanama tokare vere be didimana adi banagama ĝarodie ta banavidina.

Mamaitua na waibadama dibune ko miana

4 ¹Taumi koya kataie bo ibewa, da aba aubainama kowai kawa riuriu be kowai kawa ĝasiĝasi? Inam waikawa ĝasiĝasidima ta tubutubuĝana, baninama tubuĝa na ĝoana be noĝota veredima nopomie tawai ĝaviĝaviana. ²Taumi ami ĝoanama yabedima kadi taiye banaga kowai guridi, be yaĝoro inam yabedima tokare nam ko ragaragaudi. Taumi banaga adi purapurama ko kitedi, be ko ununuredina. Vutuna aubainama taumi ami banagama mate kowai kawa riuriu be kowai kawa ĝasiĝasina, be yaĝoro inam yabedima tokare nam ko ragaragaudi. Be aba aubainama inam yabedima nam koma ragaragau? Inam baninama, taumi Mamaitua nam komawai baĝana aubainama. ³Be deĝoda Mamaitua kowai baĝa be ami ĝoanama nam e utemi, inam baninama taumi ami noĝotama gewegewedie Mamaitua kowai baĝana. Taumi Mamaitua kowai baĝana da tauna ami ĝoanama kabe e utemi, be inam yabedima yawasanana wainua vaivaidie kabe koi yakaredi, inam nam i verena.

⁴Taumi aitauga Mamaitua ko tuatuaĝaiena, taumi inam waivi na tauĝomama mui debane e poreporena maika. Aba aubainama taumi dobu na ĝoanama kowai muriwatane? Koya kataie bo ibewa, deĝoda dobu yawasanidima koi nuapaĝoedina, taumi inam Mamaitua ko tuatuaĝaiena. Deĝoda taumi dobu yawasanidima koi turanedina, taumi inam Mamaitua

na ġaviama. ⁵Girugiruminama porane aba ya riuriuena inam giu kavakavana, bo? Girugiruminama porane umanama ya riuna, “Mamaitua Aruinama ya uteda be nopode e miamiana, be tauna inam Aruinama debane dobu yawasanidima e koukouburuedina.” ⁶Be Mamaitua raukivivere baneginama aubainama girugiruminama porane umanama ya riuna, “Mamaitua banaga rarauguyaguyaudima e biri dobiġedina, be e raukiviverena voyaġota banegidima ġarodie.”

⁷Vutuna aubainama Mamaitua na waibadama dibune ko miana, be Diaboro ko riutuaġaie da tauna e gosemi be naira e naġona. ⁸Taumi ko verauna Mamaitua diane, yodibe Mamaitua e verauna taumi diemie. Taumi gewagewa banegimima, nopomima ko koġa be ko kawa veremina, maika nema nimemima ko koġakoġana nama, be nam noporaburabui nopomie e kena. ⁹Ami gewagewama aubainama koi nuaboya be ko ġabana. Koya kwatekwatevana, yodi ko gose be ko ġabana. Koyawai nuaverena, yodi ko gose be koi nuaboyana. ¹⁰Bada matane ko ġaubo munaġa, be tauna e kawa saġemina.

¹¹Yau bana, ami banagama nam koi karakara kutuedi bo koi tara piriedi. Deġoda tam aitau turamma kwai tara piriena, tam inam Mamaitua na tarawatuma kwawai diboġina. Tam Mamaitua na tarawatuma nam sibo kuyai tara pirie, avedi! Tam sibo tarawatu kuya voteyeteyena. ¹²Tauwai tarapiri inam Mamaitua taunaġa, nam tam. Tauna vutuna tarawatu ya utedana, aubainama tauna taunaġa na ġoane nama tokare banaga ei yawasanidi bo e kawa gewegewedi, inam taunaġa ewai badena. Tam nema maika kitam, be turamma kwawai tarapirie, wa?

Seġara dokadoka avedi

¹³Taumi aitaūġa umanama ko giugiuna, “Tauda manaka bo pomai tà naġo taonie da modi tenaġa tà mia be tàì bisnis da mane dosinama tà voiena.” Inam nama banegimima ami giuma yodi yà riuemi be ko vaiena. ¹⁴Taumi nam ko kataiena da aba mateġa bo pomai e tubuġa. Taumi ami yawasanama inam kai basunama maika, yodi raġan ġaubonaġa ko kitana, be murine ei kave munaġana. ¹⁵Vutuna aubainama taumi sibo umanama koya riuriuna, “Deġoda Bada e ġoena, naumeki da tauda tà mia be umanama umanama yabedima tà voiedina.” ¹⁶Taumi ko rarau guyaguya be ko seġaseġarana. Inam kauinama ko gose pore. Seġara dokadoka inam yaba gewagewanama.

¹⁷Taumi deġoda vere koya kataiena be nam ko voie, inam tauna gewagewa.

Waiguyau banegimima ko kita kauana

5 ¹Taumi banaga waiguyau mima yodi koi beavaia kauana. Taumi tokare pipiri ko banavidina, vutuna aubainama yodi koi nuaboya kaua be

ko ḡabana. ²Taumi ami waiguyauma matabuna a bova be kwarikwari ami garama a kanidina. ³Ami manema niranira a kanidi be a raubusabusagana. Be inam raubusebuseginama tokare ei maḡatarana da taumi keda koya parena. Be inam niraniranama taumi mate tubuḡimima tokare e kani rovo be gienae kai e kara gorumina. Raḡan damonama kaiteka e tavatavana, be taumi uma taragai be mane kowai dam raka yababena. ⁴Ko kita! Taumi ami taunoyama ami sipie a noyanoya be nam kowai maesidina, vutuna aubainama adi bekurama yodi Bada wairewapana vavasaginama e vaivaiena.

⁵Taumi dobie yaba toitoi tabutabu koyai dam raka yababedi be taumiḡa kowai nuaverena. Taumi koya kani kapoteu be moraba ko nuanua sarisarina, taumi maika bawa tokare raḡan damone ta vunuḡimi be ta nigomina. ⁶Taumi banaga veredima koyai tara tautauedi be koya vunuḡidina, avedi da taudi nam aba gewagewanama ḡaromie ti voiena.

Koi raba nuetau be ko moiragina

⁷Yau bana, koi raba nuetauna naumeki da Bada e verau munaḡana. Tausipi ko noḡoti, tauna ewai raba nuetauna da kusana e dobi da kani ta gogo be maura e tubuḡana. ⁸Be teneḡinama nama taumi mate. Koi raba nuetau be piripiri raḡandie ko midi da bagibaginaḡa, baninama Bada na kaba verauma kaiteka maida.

⁹Be nam ami banagama mate koi suramudu, avedi, inam kauine tokare Bada e kovoḡimina. Baninama tauwai tarapiri tauna kaiteka maida.

¹⁰Yau bana, peroperoveta ko noḡotidi, taudi piripiri be wainuatoitoti raḡandie ai nuabagibagi be Bada isane a giugiuna. ¹¹Mamaitua inam nama banegidima yai aiainidina, baninama taudi piripiri nopodie nam ti bekuna, be ai nuabagibagina. Joub ko noḡoti. Tauna piripiri dosidima ya banavina be yaḡoro yai nuabagibagina. Vutuna aubainama Bada yai aiainina, baninama Bada tauna raunuatoitoti baneginama.

Waisaḡina be rausaḡi adi giuma

¹²Be mate, yau bana, nam ko rausaḡi. Nam mara banegidima isedie, bo dobu bo yaba ḡesaudima isedie ko rausaḡi, avedi. Taumi deḡoda koi aninana, naumeki da koi anina ḡomana, be deḡoda tuaḡai, naumeki da ko tuaḡai ḡomana. Nam i verena deḡoda tokare etare ko midi be gewagewa dosinama ko banavina.

Waisumaḡe ko moiragi

¹³Deḡoda tam aitau kwawai nuatoitoina, naumeki da kwa moiragina. Be deḡoda tam aitau kwawai nuaverena, naumeki da tam kwa sare be Bada isanama kwa kaisuḡusuḡuna.

¹⁴Deḡoda tam aitau kuya sidana, naumeki da ekalesia babadidima kwa riuedi da Bada isane aubaimma ta moiragi be oeri debame ta ḡinina.

¹⁵Be moiragi waisumaḡe, tokare Bada inam baneginama sidasidanama ei yawasanina. Be deḡoda inam baneginama ḡarone gewagewa, naumeki da Bada tokare inam baneginama na gewagewama e noḡota porena.

¹⁶Vutuna aubainama ami banabanagama mate ami gewagewama koi kawa kuvesa be ko moiragi vivirana, yodibe taumi tokare ko yawasanana. Be didimana baneginama na moiragima inam yai rewapana kua be bani biribiridima. ¹⁷Elaija ko noḡoti, tauna banaga ḡoma maika tauda. Be tauna nuanama tabutabune marakapo aubainama ya moiragina da nam sibo kusana ya dobi. Be inam raḡanine kusana nam i dobina naumeki da modi rabuiteḡa be nawaravi 6 a kovina. ¹⁸Muriḡa ya moiragi munaḡa da kusana ya ḡoḡo, be dubue kani a tubuḡana.

¹⁹Yau bana, taumi deḡoda aitu tenaḡa ḡaromie riukaua waimuriwatenenama sibo i gose be tam aitu inam baneginama ku verauḡa munaḡena Bada ḡarone, tam inam voia verenama kuya voiena, ²⁰baninama uma ko noḡoti, tam aitu da gewagewa baneginama tauna gewagewa kedane ya naḡonaḡo be tam kuya verauḡa munaḡena, tam inam baneginama gurie be kuyai yawasana munaḡena. Be na gewagewama toitoi Mamaitua ya noḡota poredina.